

Evening Dogri (NSD)

06-11-2025

खबरां

1. बिहार च असैम्बली चुनाएं दे पैहले गेड़ तैहत्त अज्ज राज्य दे 18एं जिलें दे 121 असैम्बली हलकें च वोट पाए गो।
2. बिहार दे मुख्क चुनांऽ अधिकारी होरें अज्ज पैहले गेड़ दे चुनां दरान किश मतदान केन्द्रें पर जानी-बुज्जियै बिजली दे कट लाए जाने दे राश्ट्री जनता दल दे आरोपें गी खारज करी दित्ता ऐ।
3. बिहार च दुए गेड़ दे असैम्बली चुनांऽ लेई प्रचार तेज होई गेआ ऐ। एनडीए ते महागठबंधन दे बड्डे नेता, मतदाताएं गी अपने पक्ख च करने लेई पूरी टिल्ल ला करदे न।
4. इस्राइल दे रक्षा मंत्री इस्राइल काट्ज़ होरें आखेआ ऐ जे सेना गज़ा च इस्राइल दे कब्जे आहले इलाकें च हमास दे आतंकवादियें दा सफाया करना ते उं'दिएं सुरंगें गी नश्ट करना बरोबर जारी रक्खग।
5. आईसीसी क्रिकेट महिला विश्व कप 2025 दी जेतू भारती महिला टीम दे सदस्यें अज्ज नमीं दिल्ली च राष्ट्रपति भवन च राश्ट्रपति द्रौपदी मुर्मु हुं'दे कन्नै मलाटी कीती।
6. भारत-ऑस्ट्रेलिया बश्कार जारी पंज मैचें दी टी-20 श्रृंखला दा चौथा मैच भारती टीम नै 48 रन्जें कन्नै जित्तियै सीरीज च 2-1 दी बढत बनाई लैती ऐ।

<><><><><><>

Bihar Voting

बिहार च असैम्बली चुनाएं दे पैहले गेड़ तैहत्त अज्ज राज्य दे 18एं जिलें दे 121 असैम्बली हलकें च वोट पाए गो। सं'झां 5 बजे तगर 60 फीसद कोला मता मतदान दर्ज कीता जाई चुके दा हा। मतदान दा कम्म बड्डुलै 7 बजे शुरु होआ हा जेह्दा सं'झां 6 बजे तगर जारी रेहा। मतदान गी बवस्थित ढंगै कन्नै करोआने लेई चुनां आयोग ने सुरक्षा सने होर दुए सब्बै लोड़चदे बंदोबस्त जकीनी बनाए दे हे।

<><><><><><>

CEO-Bihar

बिहार दे मुख्य चुनांऽ अधिकारी होरें अज्ज विधानसभा चुनांऽ दे पैहले गेड दरान किश मतदान केंद्रें पर जानी-बुज्झियै बिजली कटौती दे राष्ट्री जनता दल दे आरोपें गी खारिज करी दित्ता ऐ। मुख्य चुनांऽ अधिकारी होरें इनें दावें गी पूरी चाल्ली निराधार ते भ्रामक दस्सेआ। सोशल मीडिया पर राष्ट्रीय जनता दल दी पोस्ट दे जोआब च मुख्य कार्यकारी अधिकारी कार्यालय नै स्पष्ट कीता जे पूरे राज्य च मतदान सुचारू रूप कन्नै चला'रदा ऐ ते भारत दा निर्वाचन आयोग निरपक्ख ते पारदर्शी चुनांऽ प्रक्रिया सुनिश्चित करा'रदा ऐ। पोस्ट च आखेआ गेआ ऐ जे एह आरोप पूरी चाल्ली निराधार ते भ्रामक न।



Bihar-2nd Phase

बिहार विधानसभा चुनांऽ दे दुए ते अखीरी चरण आस्तै प्रचार अभियान तेज होई गेआ ऐ। एनडीए ते महागठबंधन सने होरने राजनीतिक दलें दे स्टार प्रचारक ते बड्डे नेता चुनावी इलाकें च कई चुनावी रैलियें गी संबोधित करडन। एनडीए आसेआ वरिष्ठ भाजपा नेता ते प्रधानमंत्री नरेंद्र मोदी भागलपुर ते अररिया च चुनावी रैलियें गी संबोधित करडन। तोआई, भारतीय जनता पार्टी दे वरिष्ठ नेता ते केंद्री गृह मंत्री अमित शाह पच्छिम चंपारण, पूर्वी चंपारण ते मधुबनी जिलें च चुनावी रैलियाँ करडन ते रक्षा मंत्री राजनाथ सिंह सीतामढी ते पूर्वी चंपारण जिलें च जनसभाएं गी संबोधित करडन। महागठबंधन आसेआ मुख्यमंत्री पद दे मेदवार तेजस्वी प्रसाद यादव हुंदे आसेआ अज्ज मधुबनी, सुपौल, किशनगंज ते कटिहार सने कई होरनें थाहें पर रैलियां कीतियां जा'रदियां न।



PM Varanasi

प्रधानमंत्री नरेन्द्रे मोदी शनिवारें वाराणसी दा दौरा करडन ते चार नमीं वंदे भारत एक्सप्रेस ट्रेनें गी झंडी दस्सियै रवाना करडन। नमीं वंदे भारत एक्सप्रेस ट्रेनां बनारस-खजुराहो, लखनऊ-सहारनपुर, फिरोजपुर-दिल्ली ते एर्नाकुलम-बेंगलुरु मझाटै चला करडन। इनें ट्रेनें राहें जात्तरी घट्ट समें च जात्तरी करी सकडन। एहदा मकसद सैलसफा ते मुख्य भरै च आर्थिक गतिविधियें गी बढावा देना ऐ। बनारस-खजुराहो वंदे भारत इस रूट पर सिद्धा संपर्क स्थापत करग ते मजूदा समें च चला'रदी बशेश ट्रेनें दे मुकाबले च तकरीबन 2 घैंटे 40 मिनट घट्ट समें लैग। एह ट्रेनां वाराणसी, प्रयागराज, चित्रकूट ते खजुराहो सने भारत दे किश

प्रतिष्ठित धार्मिक ते सांस्कृतिक स्थलें गी जोड़ग। लखनऊ-सहारनपुर वंदे भारत, एह जात्तरा तकरीबन 7 घैंटे 45 मिंटे च पूरी करग, जेह्दे'नै जात्तरा दे समें च तकरीबन 1 घैंटे दी बचत होग। एह्दे'नै लखनऊ, सीतापुर, शाहजहांपुर, बरेली, मुरादाबाद, बिजनौर ते सहारनपुर दे जात्तरिएं गी बड़ा फायदा होग, कन्नै गै रुड़की दे रस्तेया हरिद्वार दी पवित्तर नगरी तगर पुज्ज च बी सुधार होग। फिरोजपुर-दिल्ली वंदे भारत इस रूट पर सबनें शा तेज चलने आहली ट्रेन होग, जेह्डी छडे 6 घैंटे 40 मिंटे च जात्तरा पूरी करग। फिरोजपुर-दिल्ली वंदे भारत एक्सप्रेस राश्ट्री राजधानी ते पंजाब दे प्रमुख शैहरें फिरोजपुर, बठिंडा ते पटियाला बशकार राबते गी मजबूत करग। दक्खन भारत च, एर्नाकुलम-बेंगलुरु वंदे भारत जात्तरा दे समें गी 2 घैंटे शा मता घट्ट करी देग, जेह्दे'नै जात्तरा 8 घैंटे 40 मिंटे च पूरी होई जाह्ग। एह प्रमुख आईटी ते बवसायिक केन्द्रें गी जोड़ग, जेह्दे'नै पेशेवरें, विद्यार्थिएं ते सैलानिएं गी आरामदायक जात्तरा दा विकल्प मिलग।

<><><><><><>

Naidu-SAF

शैही हवाबाजी मैह्कमे दे केन्द्री मंत्री, राम मोहन नायडू किंजरापु होरें आखेआ ऐ जे केंद्र सरकार, भारत गी सतत विमानन ईधन यानि एस.ए.एफ. दे उत्पादन च आलमी सतह पर इक अगुआ मुख दे रूप च स्थापत करने गितै इक मजबूत ते असरदार नीति पर कम्म करा'रदी ऐ। नमीं दिल्ली च अज्ज भारत एस.ए.एफ. शिखर सम्मेलन गी संबोधित करदे होई, श्री नायडू होरें आखेआ जे भारत नै अपनी फीडस्टॉक उपलब्धता ते उत्पादन सुविधाएं दे चलदे इस खेत्तर च पैहले गै काबिले-जिक्र प्रगति करी लैती दी ऐ। उ'नें आखेआ जे सरकार मजूदा समें च उत्पादन बधाने ते नीति नियोजन लेई सबनें जरूरी हितधारकें गी किट्टे इक्के मंच पर आहने आस्तै कम्म करा'रदी ऐ।

<><><><><><>

Israel-Hamas

इस्राइल दे रक्षा मंत्री इस्राइल काट्ज़ होरें आखेआ ऐ जे सेना गज़ा च इस्राइल दे कब्जे आहले इलाकें च हमास दे आतंकवादियें दा सफाया करना ते उं'दिएं सुरंगें गी नश्ट करना बरोबर जारी रक्खग। काट्ज़ हुं'दी एह टिप्पणी कल्लै दिएं ओकड़ी खबरें दे दरम्यान आई ऐ, जेह्दे च आखेआ गेआ हा जे अमरीका ने इस्राइल गी राफ़ा च फसे दे हमास आतंकवादियें गी उं'दे

कब्जे आहले इलाकें च परतोने दी खुल्ल देने दी गुजारिश कीती ऐ। उ'नें आखेआ जे इस्राइल दा मकसद हमास गी थेआरें शा रैहत बनाना, गज़ा गी फौज शा मुक्त करना ते बंधकें दे शवें गी बरामद करना ऐ। इस्राइल दी खुफिया एजेंसियें दा अंदाजा ऐ जे तकरीबन 200 थेआरबंद हमास बंदूकधारी मजूदा समें च राफ़ा दे हेठ सुरंगें च छप्पे दे न। ध्यानजोग ऐ जे 7 अक्तूबर, 2023 गी दक्खनी इस्राइल पर होए दे हमले दरान करीबन 1,200 लोक मारे गे हे ते 252 इस्राइली ते बदेशी नागरिकें गी हमास ने बंदी बनाई लैता हा। 5 इस्राइली ते द'उं बदेशी नागरिकें दे शव अजे बी गज़ा च रक्खे गेदे न।



PM-Legal Aid

प्रधानमंत्री नरेन्द्र मोदी शनिवारें नमीं दिल्ली च कनूनी सहायता उपलब्ध कराने दे तंत्र गी मजबूत बनाने पर राश्ट्री सम्मेलन दा उद्घाटन करडन। इक बयाना मूजबए प्रधानमंत्री राश्ट्री कानूनी सेवा प्राधिकरण आसेआ तैयार सामुदायिक मध्यस्थता प्रशिक्षण मॉड्यूल दा शुभारंभ करडन ते मजबूत लोकें दे किट्ट गी संबोधित बी करडन। इस ध्याडें दे इस सम्मेलन च कनूनी सेवा ढांचे दे प्रमुख पैह्लुएंए जिश्आं कनूनी सहायता परामर्श प्रणालीए पैनल वकीलए अह.कनूनी स्वयंसेवकए स्थायी लोक अदालत ते कानूनी सेवा संस्थानें दे माली प्रबंधन पर बचार-बटांदरा कीता जाहगा।



Wavex-StartUp

सूचना ते प्रसारण मंत्रालय दे तैहत स्टार्टअप एक्सेलेरेटर वेव-एक्स ने गोवा च 20 थमां 28 नवम्बर तगर आयोजित होने आहले 56में भारती अंतर्राश्ट्री फिल्म महोत्सव-इप्फी च स्टार्टअप्स गी वेक्स बजार च हिस्सा लैने दा साहा दित्ता ऐ। इस पैह्लकदमी दा मकसद एनीमेशन, विजुअल इफेक्ट्स, गेमिंग, कॉमिक्स ते एक्सटेंडेड रियलिटी सने मनोरंजन खेत्तर दे उभरदे स्टार्टअप्स गी वैश्विक उद्योग जगत दे दिग्गजें, निवेशकें ते प्रोडक्शन स्टूडियो कन्नै जुडने लेई इक मंच प्रदान करना ऐ। मंत्रालय ने दस्सेआ ऐ जे वेव-एक्स बूथ लेई बुकिंग शुरू करी दिती गई ऐ, जेहड़ी इप्फी च वेक्स बजारै च बशेश स्टार्टअप शोकेस ज़ोन ऐ। इच्छुक स्टार्टअप wavex.wavesbazaar.com पर पंजीकरण करोआई सकदे न। मंत्रालय ने आखेआ ऐ जे स्टॉल सीमित न ते इ'दी बंडु 'पैहले आओ, पैहले हासल करो' दी बिनाह उप्पर कीती जाहगा।

Gaming-Conference

इंडिया गेम डेवलपर सम्मेलन 5 थमां 7 नवम्बर तगर चेन्नई च आयोजित कीता जा'रदा ऐ। उपमुख्यमंत्री उदयनिधि स्टालिन हुं'दी मजूदगी च तमिलनाडु सरकारै गेमिंग कन्नै जुडे दे बक्ख-बक्ख संगठनें कन्नै केई समझौता ज्ञापनें पर दस्तख्त कीते। उपमुख्यमंत्री उदयनिधि होरें आखेआ ऐ जे 6एं म्हीनें दे अंदर चेन्नई च गेमिंग लेई इक उत्कृश्टता केंद्र स्थापत कीता जाह्ग। कोयंबटूर, मदुरै, त्रिची, सलेम ते तिरुनेलवेली च इलाकाई केन्द्र स्थापत कीते जाडन। उ'नें दस्सेआ जे राज्य च इक सुविधा केन्द्र बनाया जाह्ग जेह्दा बपार-कारोबार गी सखल्ला बनाने लेई इक्के थाहै पर सब्बै हल उपलब्ध करोआग। इंडिया गेम डेवलपर सम्मेलन कन्नै चेन्नई च तकनीकें दे खेत्तर च आलमी सतह दे मौके पैदा होडन। इस सम्मेलन च आलमी सतह दे गेमिंग उद्योग दे प्रमुख, 150 शा मते सत्रें च हिस्सा लै करदे न।



Phillipines-Storm

फिलीपीन दे राष्ट्रपति फर्डिनेंड मार्कोस जूनियर होरें देशै च इस ब'रे दे सबनें शा बनाशकारी तूफान 'कालमेगी' करी होई दी बड़ी भारी तबाही परैन्त, अज्ज देसै च एमरजेन्सी दी स्थिति घोशत करी दिती ऐ। इस तूफान करी मध्य प्रांतें च तकरीबन 114 लोकें दी मौत होई गई, जदके सैकड़ों-बद्धे लोक लापता न। सबनें शा मती तबाही देशै दे सबनें शा मती आबादी आहले केंद्री टापु 'सेबू' पर होई ऐ। एहू तूफान कल दक्खनी चीन सागर च चली गेआ। नागरिक सुरक्षा सरबन्धी दफतरै आखेआ ऐ जे इस आपदा करी लगभग 20 लक्ख लोक प्रभावत होए ते 5 लक्ख 60 ज्हार शा मते ग्रामीण विस्थापित होए न।



Prez. Team India

आईसीसी क्रिकेट महिला विश्व कप 2025 दी जेतू भारती महिला टीम दे सदस्ये अज्ज नमीं दिल्ली च राष्ट्रपति भवन च राष्ट्रपति द्रौपदी मुर्मु हुं'दे कन्नै मलाटी कीती। इक सोशल मीडिया पोस्ट च राष्ट्रपति मुर्मु होरें टीम गी बधाई दिती ते आखेआ जे उ'नें इतिहास रचेआ ऐ ते युवा पीढ़ी लेई आदर्श बनी गई ऐ। राष्ट्रपति होरें आखेआ जे भारती महिला टीम ने 7 बारी दी विश्व चैंपियन ऑस्ट्रेलियन टीम गी हराइयै अपनी समर्थ च सबनें भारतवासिये दा भरोसा मजबूत कीता ऐ। राष्ट्रपति होरें आखेआ जे फाइनल च इक मजबूत टीम गी बड्डे फर्क कन्नै हराना टीम दी श्रेष्ठता दी शानदार मिसाल ऐ। राष्ट्रपति मुर्मु होरें आखेआ जे भारती

महिला टीम दे सदस्य रोल मॉडल बनी गेदे ना। युवा पीढी ते खास तौर पर कुड़ियां उंदे शा प्रेरित होइयै जीवन च अगगे बध्दणन। उंनें विश्वास जताया जे जेह्डी म्हारथ दे कन्नै भारती महिला टीम ने इतिहास रचेआ ऐ, भविक्ख च बी ओहू भारती क्रिकेट गी शिखर पर बनाई रक्खडन। राष्ट्रपति होरें आखेआ जे भारती टीम दी कामयाबी दे पिच्छे खड्डारिएं दी सख्त मेहनत, श्रेष्ठ खेड्डू कौशल ते संकल्प ते उंंदे परोआरें ते क्रिकेट प्रेमियें दा प्यार ते आशिर्वाद रेहा ऐ। राष्ट्रपति होरें प्रमुख कोच, बल्लेबाजी कोच, फील्डिंग कोच ते सहयोगी अमले दी बी सराहना कीती। उंनें कामना कीती ते एहू सब्बै लोक टीम इंडिया दी कामयाबी दे नमें रिकॉर्ड बनाडन।



PM Women Cricket

प्रधानमंत्री नरेन्द्र मोदी होरें कल लोक कल्याण मार्ग स्थित अपने आवास पर महिला विश्व कप विजेता खड्डारियें दी मेजबानी कीती। मोदी होरें महिला क्रिकेट टीम गी उंदी जित्त पर बदाई दिती ते टूर्नामेंट च उन्दी शानदार वापसी दी सराहना कीती। प्रधानमंत्री होरें खड्डारियें सोया फिट इंडिया दे सनेह गी अगगे बदाने दा आग्रह कीता। मोदी होरें obesity दी बददी समस्या पर बी चर्चा कीती। उंनें फिट रौहने दे महत्व पर लौ पाई। कसान हरमन प्रीत कौर होरें 2017 च मोदी हुंदे कन्नै होई दी मलाटी गी चेता कीता, जिसलै ओहू ट्रॉफी बगैर गै उन्दे कन्नै मिलियां हियां।



Sansad Khel Mahotsav

कॉर्पोरेट मामलें दे राज्य मंत्री हर्ष मल्होत्रा होरें ऐलान कीता ऐ जे इस म्हीने दी 16 तरीक गी नमीं दिल्ली च सांसद खेल महोत्सव दे तैहत नमो रन मैराथन दा आयोजन कीता जाह्ग। सांसद खेल महोत्सव दा उद्घाटन करदे होई राज्य मंत्री होरें दस्सेआ जे खेल महोत्सव लेई तकरीबन 30 ज्हार प्रतिभागियें पंजीकरण करोआया ऐ। उंनें दस्सेआ जे एहदा आयोजन त्रै चरणें च होग, जेहदे च भारती पारंपरिक खेड्डुं दे कन्नै ओलंपिक च शामिल खेड्डुं दे बी टूर्नामेंट आयोजित कीते जाडन। श्री मल्होत्रा होरें इब्बी दस्सेआ जे टूर्नामेंट च बेहतरिन प्रदर्शन करने आहले प्रतिभागियें गी तजुर्बेकार कोच, शैल-बधिया उपकरण ते बड्डे स्टेडियमें च खेड्डुने दा मौका प्रदान कीता जाह्ग। उंनें गलाया जे इस गैहू कन्नै युवाएं गी अपने कौशल गी नखारने ते आलमी सतह उप्पर देशै दा नांऽ रोशन करने च मदाद मिलग।

Hockey Jr World Cup

मर्दे दे एफ.आई.एच. हॉकी जूनियर विश्व कप 2025 दी ट्राफी गी भारत दे बक्ख-बक्ख हिस्सें च लेते जाने दा रोमांच, बरोबर जारी ऐ ते हुन औंदी 11 नवम्बर गी एहू ट्रॉफी, जम्मू-कश्मीर आवा करदी ऐ। इस ट्राफी गी मुख्य दे बक्ख-बक्ख हिस्सें च लेने दी शुरुआत जंदी 7 नवम्बर गी नमीं दिल्ली थमां होई ही ते एहूदी एहू जात्तरा 26 नवम्बर 2025 गी थिरूवनन्थपुरम पुज्जियै संपन्न होई जाह्ग। इस जात्तरा दा मकसद, आलमी सतह दी इस प्रतियोगिता गी लेइयै मुख्य भरै दे बसनीके अंदर आकर्षण ते जोश पैदा करना ऐ। मर्दे दे एफ.आई.एच. हॉकी जूनियर विश्व कप 2025 दे 14में संस्करण दा आयोजन तमिलनाडु दे मदुरै ते चेन्नै च मेयर राधाकृष्णन हॉकी स्टेडियम च औंदी 28 नवम्बर थमां लेइयै 10 दिसम्बर 2025 तगर कीता जाह्ग। नेहा पैहली बारी होआ करदा ऐ जे इस प्रतियोगिता च ऐगती 24 टीमां, खिताब लेई आपूं-चै मुकाबले खेड्डन।



Weather

जम्मू-कश्मीर दे बक्ख-बक्ख इलाके च हलके कोला दरमेयाने दर्जे दी बरखा ते किश उप्परलिए धारें पर बर्फबारी दे बाद मकामी मौसम विभाग नै अज्ज कोला लेइयै 16 नवम्बर तोड़ी लगभग पूरे जम्मू-कश्मीर च मौसम आम तौरा पर खुशक रौहने दी पेशगोई कीती ऐ। आकाशवाणी दे जम्मू संवाददाता नै दस्सेया ऐ जे अज्ज कोला लेइयै 19 नवम्बर तोड़ी मौसम आम तौरा पर खुशक रौहने दी भविक्खवाणी मगरा केन्द्र शास्त प्रदेश दे करसानें दना राहत महसूस कीती ऐ कीजे हून उनेंगी फसलें दी बाहड्डी ते होरनें कम्में गी लेइयै कोई चिंता नैई ऐ ते ओ अपनियां गतिविधियां जारी रखी सकदे न। मौसम विभाग नै 17 ते 18 तरीक गी मौसम इक बारी परतियै बदलोखडा रौहने दे आसार दस्से न पर कुसे भारी बरखा जा बर्फबारी दी कोई संभावना नैई ऐ।



Fresh-Snowfall

उत्तरी कश्मीर दे मशहूर सैलानी थाह गुलमर्ग होई दी ताजा बर्फबारी करी सैलानिएं दे चेहरे खिड़ी उठे दे न। अपनी खूबसूरती लेई जाने जाने आहले गुलमर्ग पर हुन बर्फू दी चिट्ठी चादर बिछी गेदी ऐ ते मुखे दे बक्ख-बक्ख हिस्सें थमां उत्थे पुज्जे दे सैलानी इस बर्फबारी दा

पूरा-पूरा नंद ठोआ करदे ना। मुकामी लोकें दा आखना ऐ ताजा बर्फबारी कन्नै होर मते सैलानी गुलमर्ग लेई आकर्शित होडन।



Mens's Cricket

भारत-ऑस्ट्रेलिया बश्कार जारी पंज मैचें दी टी-20 श्रृंखला दा चौथा मैच भारती टीम नै 48 रन्जें कन्नै जित्तिथै सीरीज च 2-1 दी बढत बनाई लैती ऐ। हुन सीरीज दा अखीरी मकाबला 8 नवंबर गी ब्रिसबेन च खेड्डेआ जाह्गा। पहले बल्लेबाजी करदे होई भारती टीम नै 20एं ओवरें च 8 विकेटें दे नुकसान पर 167 रन्ज बनाए। एहदे परते च ऑस्ट्रेलियाई टीम 18 ओवरें ते 2 गेंदें च 119 रन्ज बनाइयै ऑलआउट होई गई। शुभमन गिल नै भारत आस्तै सभनें शा बद्द 46 रन्जें दी पारी खेड्डी। ओहदे बाद गेंदबाजें कमाल करदे होई एह मुकाबला भारत दी झोली च पाई दित्ता।

